



Sa Natzione

U.R.N. Sardinnya ONLINE

L'opinione

Bilinguismu democraticu?

S'annu colatu pro *Sa Natzione* apo publicatu s'articulu "[Autonomie e D.P.R. n. 752/76: La potenza economica della dogana linguistica](#)". S'obiettivu itti cussu de acher videre un'esempiu de tutela linguistica chi produit economia pro sos Sudtirolesos. In sa pubblica amministrazione e in tottus sos servizios publicos de Bolzano travallat solu chie tenet su patentinu linguisticu. Sa legge no est incostituzionale: su prinzipu est chi s'utente devet esser cumpresu dae s'operatore, ca si una pubblica amministrazione non si fachtet cumprendere dae sos contribuentes si tratat de discriminazione. Pro custa rejone benit prima chie ischit sa limba de su locu e no atteros italianos. Proitte apo attu custu e atteros esempius? Ca in Sardinna, a partire dae sos indipendentistas, non conoschimos vene su valore politicu de sa "normalizzazione" de sa limba. E sa "normalizzazione" est una fase sotziale ki in Sardinna 'enit a pustis de una standardizzazione de sa limba. E s'istandardizzazione est unu processu tecnicu e politicu.

Dae pacu est naschitu su comitatu "[Bilinguismu democraticu](#)", chin Alexandra Porcu e atteros. Calicune pro sa revisione de sa LSC (sa Limba Sarda Comuna adottata chin sa giunta Soru), e calicune pro istituzionalizzare una macrodivisione de su Sardu in logudoresu e campidanesu. Jeo pesso chi toccat a esser craros e a non confundere sa linguistica chin sa politica, ca Porcu cando vaeddada de azzustare sa LSC e poi narat de esser "filo-campidanesa" no azzuat a ghettare abba supra su 'ocu de sas brias pro sa limba. Sono brias chi a sos Sardos no interessana, e chi no azzuana nemmancu sos appassionati e sos ispecialistas a fachere unu passu ainnantis a sa chistione, e chi finini pro azzuare, senza lu cherrere, sos italianistas. A sa matessi manera sos chi ana semper travallatu pro sa LSC non depene serrare sa janna a sa partetzipazione tzivile espressa dai custu novu comitatu, e so abbarratu cuntentu de s'apertura atta dae Corraine e Corongiu in [occasione](#) de sa presentata de su novu Currettore regionale ortograficu Sardu online.

In su pianu politicu b'est unu puntu virnu chi non potimmos ignorare e chi in *Sa Natzione* ammos iscrittu dae annos: su Sardu non potet esser divisu. Dividere politicamente una limba cheret narrere dividere una nazione e sa sua "primogenitura" politica in d'onzi locu amministrativu, dae su prus artu gradu 'e governu a s'uffitziu minore de unu Comune. Sa limba unica est s'urtima difesa contr'a s'Istatu-nazione italianu e a s'assimilazionismu economicu e culturale chi l'at semper distintu. Si non cumprendimmos cust'aspettu politicu ammos a perdes tempu chin cussu linguisticu, e sa limba Sarda ata a sichire a morrere contr'a s'egemonia de cussa italiana. Non b'at atteros medios, o chenza limba ammos a perder vintzas s'Autonomia.

No tenet tortu [Pepe Corongiu](#) cando narat chi sa LSC no est perfetta ma est s'unica chi tenimmos. Dae custu puntu virnu toccat de torrare a partire.

E poi cherjo ider sa die chi Diegu Corraine e Roberto Bolognesi s'ana istringher sa manu.

Adriano Bomboi, 01-05-14.